

**Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaat nr. 10, 29. november 2013-imeersoq**

(Erniat ilanngaatigineqarsinnaanerisa killilerneqarnerannik atorunnaarsitsineq, "carry back"-imik atorunnaarsitsineq aamma akileraarutit A-t iluanaarutisianillu akileraarutit akilerneqarfissaattut killiliussap sivitsorneqarnera)

**§ 1**

Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi, Inatsisartut inatsisaatigut nr. 9, 3. december 2012-imeersukkut kingullermik allanngortinneqartumi makku allannguutigitinneqarput:

1. § 15, imm. 5, atorunnaarsinneqarpoq.

2. § 24, imm. 1, nr. 3, ima oqaasertaqassaaq:

"3) akiitsut erniaat taakkununggalu atatillugu sullissinnermut matussutissatut ingerlaavartumik ernialiuttakkat (løbende provision), taamaattorli tak. § 15, imm. 4."

3. § 30, imm. 6, atorunnaarsinneqarpoq.

Imm. 7 aamma 8 matuma kingorna tassaalerput imm. 6 aamma 7.

4. § 30, imm. 7-imi, imm. 6-inngortumi allassimasoq "imm. 3-miit 6-imut" allanngortinneqarpoq ima: "imm. 3-miit 5-imut".

5. § 31, imm. 2, ima oqaasertaqassaaq:

"Imm. 2. Amigartoorutilli imm. 1-imi pineqartut, § 30, imm. 1 aamma 3-mi maleruagassat naapertorlugit, ukiumut aningaasarsiorfiusumut kingusinnerusumut ingerlatsivimmi tassanerpiaq aningaasarsianit sinneqartoorutaasunit ilanngaatissanngorlugit nuunneqarsinnaapput."

6. § 52, imm. 7, ima oqaasertaqassaaq:

"Imm. 7. Selskabit kattunneranni taakku arlaat ukiup kattuffiusup siuliini amigartooruteqarsi-mappat amigartoorutit taakku, selskabip unittup imaluunniit ingerlaqqittup ukiut siuliini tallimani qaninnerni aningaasarsiaanit akileraaruteqaataasussanit ilanngaatigineqarsinnaanngillat."

7. § 81, imm. 1, oqaaseqatigiit siulliit ima oqaasertaqassapput:

"Aningaasat unerartitsisussaaitap qaammatisiutit malillugit qaammammi unerartissimasai qaammatip tulliaata aallaqqaataani akiligassanngussapput, piffissaagallartillugu akiliiffissaq kingulleq tassaalluni qaammatip akiligassanngorfiup tulliani qaammatip ulluisa aallaqqaataat."

8. § 88, imm. 1, oqaaseqatigiit siulliit aamma aappaat ima oqaasertaqassapput:

”Iluaaarutisianit akileraarutit unerartitat ingerlatseqatigiiffiup, qaammatip iluaaarutisianik tunniussinissamik pisassanngortitsinissamilluunniit aalajangiiffiusup tulliani kingusinnerpaamik qaammatip ulluisa aallaqqaataanni akileraaruseriffimmut akilissavai. Aningaasaatinik agguaassineqarpat iluaaarutisianit akileraarutit unerartitat, nalunaaqqusilluni killiliussap qaangiunnerata kingorna ullut qulit amerlanerusulluunniit qaangiunneranni qaammatip tulluuttup kingusinnerpaamik ulluisa aallaqqaataanni akilerneqassapput.”

## § 2

Inatsisartut inatsisaat atortuulissaaq ulloq 1. januar 2014, taamaattorli tak. imm. 2.

*Imm. 2. § 1, nr. 3-miit 6-imut, akuersissutitut 1. december 2013 sioqqullugu nalunaarutigineqarsimanngitsunut atuutissapput.*

*Namminersorlutik Oqartussat, ulloq 29. november 2013*

  
Aleqa Hammond